

Nationála geahččaleamit

Lohkan 5. ceahkki
Ovdamearkabargobihtát

Vielpá báníit

Billa vujii fiinna luottaidd muohttagii, jurddašii Állat. Sus ledje giedat juo jieknjume gítta stoahkanbiillii, muhto lei nu somá olgun stoahkat! Lei juo guhká stoahkan olggobealde viesu, go eadni skuvihii viesu lusa biillain, ja unna vielpáš njuikii olggos. Állahii beana! - Don gii nu čeahppi leat leamaš čorget viesu, oaččut dál iežat beatnaga, mitalii eadni ja cuigii vielpái, mii gáskkii Állaha biilla moallun.

Hilbes beana! Állat suhtai beatnagii ja bálkestii muohtaspáppa dan njeaiga. Dat riežui ja ruohtai uvssa lusa. Állaha biilla lei gáskojuvvon visot, ja Állahis lei váivi.

Eadni čilgii ahte vielpás leat báníit, mat saknjidit, muhto Állat ii beroštan, dat hilbes vielppis lei borran su biilla! Állahis ledje mánga biilla, manne fertii juste su fiinna biilla borrat, jearahalai eatnis. Eadni vástádalai, ahte vielppis gáskkaša dan maid gávdná, nu ahte de ii ábut guođdit láhttái dinggaid mat eai galgga billašuvvat.

Állat ii liikon obage vielpái, ja čievččastii go eadni ii oaidnán. Gal dat lei hilbes vielppis mii borrá olbmo dinggaid, ja gáská vel leastogežiid! Ii son goit gáskkašan biillaid ja leasttuid go mielkebáníit gahčče eret! Ja vielppis lei odne vel gožžan láhttái, ja Állat duolmmastan dasa! Fišš, man nuoskkes beana!

Muhtun eará beaivvi bođii vielppis Állaha lusa go son lei dahkame Lego-viesu. Vielppis čohkkedii báldii, dego geahččat maid Állat bargá. Vielppis goarjju ja geahčestii Állahii, dego lei váivahuvvan go billistan lei Állaha duhkorasaid. De njoalostii Állaha ámadaju ja Állat bohkosii. Seamma dat ii lean nu hilbes vielppis go lei doivon. Dušše saknjidedje báníit veháš.

Dearvvuođat Állahis

Gáldu: Ávvir nr 50. lávvardat, njukčamánnu 10. b. 2012

Ovddit siiddu teaksta lea vižžojuvvon Ávviris. Ane teavstta go vástidat dáidda gáždagaide.

1. Guđe jagiáiggi birra lea dát teaksta?

- A. Dálvi
- B. Geassi
- C. Čakča
- D. Muorječoaggináiggi

2. Galle olbmo leat mielde dán muitalusas?

- A. 0
- B. 1
- C. 2
- D. 3

3. Galle stoahkanbiilla ledje Állahis?

- A. Moadde stoahkanbiilla
- B. Okta stoahkanbiilla
- C. Mánnga stoahkanbiilla
- D. li oktage

4. Manne Állat ii liiko vielpái?

- A. Go son duolmmastii vielpágužžii
- B. Go gáskkašii su fiidnámus biilla
- C. Go ii oba liiko ge elliide
- D. Go njoalui su ámadaju

5. Merke lea go čuoččuhus riehta vai boastut

Vielppis gáskkaša buotlágan dinguaid	Riekta	Boastut
Állahis leat mielkebánit	Riekta	Boastut
Lea buoremus guođđit dinguaid láhtái/guolbái	Riekta	Boastut
Állat liiko vielpái ovttatmanos	Riekta	Boastut
Vielppis gužžá láhtái	Riekta	Boastut

6. Guđe beaivvi lea dát bihtá almmuhuvvon?

- A. Duorastaga
- B. Bearjadaga
- C. Lávvardaga
- D. Sotnabeaivvi

7. Gii lea bihtá váldopersovdna?

.....

8. Manne jurddašii Állat ahte vielppis dáidá leat siivui?

.....

.....

Schweigaards gate 15
Postboks 9359 Grønland
0135 OSLO
Telefon 23 30 12 00
utdanningsdirektoratet.no